



Broj/Број: 01/2а-50-1-2-13/07
Sarajevo/Сарајево, 26.09..2007.

ZAPISNIK

13. sjednice Komisije za vanjske poslove Zastupničkog doma Parlamentarne skupštine Bosne i Hercegovine, održane 26.09..2007. godine

Sjednica je počela u 11.30 sati i vodio ju je predsjednik Komisije Slavko Matić. Sjednici su prisustvovali sljedeći članovi Komisije: Slavko Matić, Denis Bećirović, Milica Marković, Husein Nanić, Azra Alajbegović, Davorin Semenik –privremeni sekretar Komisije te Mirsada Bukarić Kovačević ispred Odjela za međunarodne odnose i protokol PS BiH. Odsutni su bili Azra Hadžiahmetović, Milorad Živković, Sadik Ahmetović i Sefer Halilović. Zapisnik su vodili studenti - stažisti Mirjana Brčkalo i Isović Lejla.

Ova sjednica Komisije, sa samo jednom tačkom dnevnog reda, je sazvana **usmeno**.

DNEVNI RED

- 1) Razmatranje dopisa Ambasade BiH u Ruskoj Federaciji, poslanog 21.09.2007 godine (poziv Komisiji za vanjske poslove ZD PSBiH za posjetu Komitetu za vanjske poslove Državne skupštine Ruske Federacije)

Ad.-1. Razmatranje dopisa Ambasade BiH u Ruskoj Federaciji (poziv Komisiji za vanjske poslove ZD PSBiH za posjetu Komitetu za vanjske poslove Državne skupštine Ruske Federacije)

Predsjednik Komisije za vanjske poslove g. Matić je prisutnim članovima ukratko obrazložio razlog hitnog, usmeno sazvanog zasjedanja Komisije na kojem je potrebno razmotriti dopis Ambasade BiH u Ruskoj Federaciji.

Naime, putem ovog dopisa upućen je poziv Komisiji za vanjske poslove ZD PS BiH za radni sastanak sa Komitetom za vanjske poslove Državne skupštine Ruske Federacije, 12. oktobra 2007 godine.

G. Matić je napomenuo da je upoznat sa ranijim, usmenim i nezvaničnim kontaktima i dogovorima g. Envera Halilovića, ambasadora BiH u Ruskoj Federaciji, o pomenutoj posjeti. Međutim, g. Matić se osvrnuo na problem u vezi sa predviđenim datumom održavanja sastanka, a to je 12. oktobar koji je dan nakon predviđenog održavanja sjednice Zastupničkog doma PS BiH te da se početkom mjeseca oktobra u Ruskoj Federaciji održavaju izbori.

G.Matić je sugerisao da se pomenute obaveze i događaji uzmu u obzir prilikom dogovora članova Komisije o realizaciji ove službene posjete.

Za riječ se, potom, javio g. Denis Bećirović, član Komisije koji je konstatovao da se ova sjednica Komisije može tretirati redovnom 13. sjednicom, s obzirom da postoji i kvorum te da na narednoj sjednici očekuje verifikaciju zapisnika sa 11., 12., i ove 13. sjednice Komisije.

Za dodatna pojašnjenja u vezi posjete delegacije Komisije ruskoj Dumi, javila se gđa Mirsada Bukarić Kobačević iz Odjela za međunarodne odnose i protokol PS BiH.

Gđa Bukarić je istakla da postoji zainteresovanost ruske Dume za kontaktima i saradnjom sa parlamentarnim komisijama PS BiH pa je shodno tome, Duma kontaktirala Ambasadu BiH u Ruskoj Federaciji. Ambasada BiH je poslala dopis uz propratnu pozivnicu za posjetu koju je Komisiji za vanjske poslove PS BiH uputio Komitet za vanjske poslove Državne skupštine Ruske Federacije. Dopis je, osim u MVP BiH, prosljeđen i Komisiji za vanjske poslove PS BiH.

U svom daljem pojašnjavanju, gđa Bukarić se osvrnula na problem predviđenog datuma posjete i naglasila da se o tom problemu već raspravljalo i na Kolegiju Zastupničkog doma gdje je donesen zaključak da ambasador BiH u Ruskoj Federaciji, g. Enver Halilović kontaktira Komitet za vanjske poslove Državne skupštine Ruske Federacije, zatraži prolongiranje ove posjete i u dogovoru sa ruskom stranom utvrdi novi datum posjete.

Azra Alajbegović, član Komisije je dodala da prolongiranje posjete ne bi trebalo biti više od 7 dana jer je već poznato da je slijedeća sjednica Zastupničkog doma zakazana za 31. oktobar. Takođe je predložila da se Komisija što prije dogovori oko broja članova koji će činiti delegaciju Komisije.

Milica Marković, član Komisije je napomenula da ovaj poziv nikako ne treba odbiti ali da je svakako potrebno ovu radnu posjetu ukomponovati sa obavezama članova Komisije.

G. Denis Bećirović je izrazio sumnju u mogućnost prolongiranja datuma posjete. Predložio je, s obzirom na činjenicu da je ovo prvi put da Komisija sama odlučuje o sastavu delegacije, da sve treba uozbiljiti, tj. ozbiljno razmotriti koliko ljudi će biti u delegaciji i odrediti svrhe posjete. Bećirović je, govoreći o službenim putovanjima zastupnika PS BiH, iskoristio priliku da zvanično zatraži da svi članovi Komisije za vanjske poslove ZD PS BiH iz aktuelnog saziva, na narednoj sjednici Komisije dostave izvještaj o svojim službenim putovanjima u ovih 10 mjeseci njihovog mandata. Bećirović je naglasio da će se, tek nakon što dobije tražene informacije, odrediti prema ovom pozivu i odlučiti da li će biti član delegacije Komisije.

Gđa Bukarić je odgovorila g. Bećiroviću obećanjem da će mu već do naredne sjednice Komisije dostaviti sličan izvještaj o službenim putovanjima zastupnika PS BiH, koji je rađen za protekli period od početka aktuelnog mandata do primopredaje mjesta predsjedavajućeg ZD PS BiH g. Miloradu Živkoviću od strane g. Beriza Belkića.

Privremeni sekretar Komisije, Davorin Semenik je takođe ukazao na potrebu određivanja broja članova delegacije, podsjetivši prisutne da, kao što je i uobičajena praksa, sve troškove snosi Parlamentarna Skupština BiH.

Gđa Bukarić je podsjetila na važnost ovakvih vidova parlamentarne suradnje pa će, u skladu s tim, članovima delegacije biti dodjeljeni podsjetnici koji će im biti od pomoći prilikom priprema za radnu posjetu.

G. Matić je predložio da se članovi Komisije odrede prema ovom pozivu tek nakon što se sa ruskom stranom utvrdi novi datum posjete i nakon što se članovi Komisije upoznaju sa detaljima i programom posjete ali je i sugerisao da broj članova delegacije ne bi trebao biti veći od 5.

Gđa Marković je mišljenja da bi delegaciju trebalo sačinjavati najmanje 5 članova s obzirom na brojnost članova Komiteta za vanjske poslove Državne skupštine Ruske Federacije.

Gđa Bukarić je podsjetila da prilikom odabira članova delegacije treba voditi računa i o jednakoj nacionalnoj zastupljenosti konstitutivnih naroda u BiH.

G. Matić je zaključio da će, po dobijanju odgovora iz Ambasade BiH o promjeni datuma posjete tj. utvrđivanju novog, članovi Komisije biti anketirani i da će se tom prilikom izjasniti ko želi da ide u posjetu.

Sjednica je završila svoj rad u 12 sati.

PRIVREMENI SEKRETAR
KOMISIJE ZA VANJSKE POSLOVE
Davorin Semenik

PREDSJEDNIK
KOMISIJE ZA VANJSKE POSLOVE
Slavko Matić

Kopija: MVP-u BiH